

Bisnes

Semakan kadar, perluasan skop SST dikuat kuasa 1 Julai

Selasa,
10 Jun 2025

bhbiz@nstp.com.my

→ Ikuti lebih berita
di www.bharian.com.my



Usaha perkukuh kedudukan fiskal dengan tingkat hasil dan meluaskan asas percukaian

Oleh Mahanum Abdul Aziz
mahanum_aziz@bh.com.my

Barangan pilihan tertentu seperti *king crab*, salmon, kod, cendawan truffle, buah-buahan import, essential oil, kain sutera dan jentera industri akan dikenakan cukai jualan sebanyak 5 peratus berkuat kuasa 1 Julai 2025, menurut Kementerian Kewangan.

Ia susulan pelaksanaan semakan dan perluasan skop Cukai Jualan dan Perkhidmatan (SST) yang diumumkan dalam Belanjaan 2025 bertujuan mengukuhkan kedudukan fiskal negara dengan meningkatkan hasil dan meluaskan asas percukaian bagi menambah baik mutu jaringan keselamatan sosial tanpa membekalkan rakyat terbanyak.

Menurut Kementerian Kewangan, beberapa barangan pilihan premium dikenakan cukai jualan 10 peratus seperti basikal lumba dan lukisan tangan antik.

Sementara barangan keperluan asas harian berkadar sifar peratus kekal bagi ayam, lembu,

kambing, ikan, udang, sotong, sayuran, buah-buahan tempatan, beras, barli, oat, gandum, tepung, sardin tin, gula, garam, roti putih, pasta, bihun, mi, mi segera, susu, minyak masak, ubat, peranti perubatan, buku, jurnal, surat khabar dan makanan peliharaan.

Cukai jualan sifar peratus juga kekal bagi bahan asas pembinaan seperti simen, batu dan pasir serta input sektor pertanian seperti baja, racun, jentera pertanian dan penternakan.

Menteri Kewangan II, Datuk Seri Amir Hamzah Azizan dalam satu kenyataan berkata, kerajaan komited untuk meneruskan pembaharuan di bawah kerangka Ekonomi MADANI.

Beliau berkata, bagi memastikan rakyat terbanyak tidak terkesan daripada semakan semula SST, Kerajaan MADANI mengambil pendekatan yang bersasar untuk memastikan barangan dan perkhidmatan asas tidak dikenakan cukai.

Selain itu, katanya, pelbagai kemudahan turut disediakan bagi mengurangkan kesan kepada perusahaan mikro, kecil dan sederhana (PMKS).

"Melengkapi usaha Kerajaan MADANI untuk merencanakan ekonomi dan memperkukuh jaringan keselamatan sosial, hasil tambahan daripada penambahbaikan SST ini akan membolehkan penambahbaikan lanjut dalam perkhidmatan awam khususnya peningkatan jumlah bantuan tunai kepada rakyat, serta memperkukuh prasarana asas dan penyam-

paian perkhidmatan awam.

"Tambahan hasil ini dapat dimanfaatkan seluruh negara tanpa menambah beban kepada majoriti rakyat," katanya.

Berkuat kuasa 1 Julai 2025, skop cukai perkhidmatan diperluaskan meliputi enam jenis perkhidmatan iaitu sewaan atau pajakan, kerja pembinaan, kewangan, jagaan kesihatan swasta, pendidikan dan kecantikan.

Khidmat sewa atau pajakan

Bagi perkhidmatan sewaan atau pajakan, cukai perkhidmatan akan dikenakan pada kadar 8.0 peratus bagi syarikat penyedia perkhidmatan yang mencapai nilai ambang iaitu RM500,000 jumlah pendapatan sewaan atau pajakan.

Kerajaan MADANI menyediakan kemudahan pengecualian cukai perkhidmatan itu bagi perkhidmatan sewaan atau pajakan ke atas bangunan kediaman, bahan bacaan, pajakan kewangan dan aset ketara di luar Malaysia dan penyewa PMKS dengan jualan tahunan kurang RM500,000.

Pengecualian itu turut meliputi perniagaan kepada perniagaan (B2B) dan pelepasan kumpulan (group relief) bagi mengelakkan kesan cukai berganda dan kontrak tidak boleh disemak atau *non-reviewable contract* diberikan pengecualian 12 bulan daripada tarikh kuat kuasa.

Bagi perkhidmatan kerja pembinaan, cukai perkhidmatan akan dikenakan pada kadar 6.0 peratus bagi syarikat penyedia perkhid-

matan yang mencapai nilai ambang iaitu RM1.5 juta.

Kerajaan MADANI menyediakan layanan khas seperti nilai ambang yang lebih tinggi pada RM1.5 juta bagi meringankan beban pematuhan cukai kontraktor kecil dan sederhana.

Cukai itu tidak dikenakan ke atas bangunan kediaman dan kemudahan awam berkaitan rumah kediaman; pengecualian B2B bagi mengelakkan kesan cukai berganda dan *non-reviewable contract* diberikan pengecualian 12 bulan daripada tarikh kuat kuasa.

Cukai perkhidmatan akan dikenakan pada kadar 8.0 peratus ke atas perkhidmatan kewangan berasaskan fi atau komisyen.

Kerajaan MADANI menyediakan layanan khas seperti perkhidmatan kewangan asas untuk rakyat kekal tidak dikenakan cukai perkhidmatan termasuk perbankan asas serta bayaran berasaskan faedah atau untung dalam prinsip pembiayaan syariah.

Perkhidmatan kewangan lain yang tidak dikenakan cukai perkhidmatan adalah keuntungan pertukaran mata wang asing dan pasaran modal, caj atau bayaran yang bersifat punitif, urus niaga kiriman wang keluar Malaysia, fasiliti kewangan yang berhubung secara langsung dengan barang yang dieksport, caj kepada ejen kiriman wang di luar Malaysia atas urus niaga kiriman wang ke dalam Malaysia dan perkhidmatan pembrokeran atau penaja jaminan berkaitan insurans/takaful nyawa, perubatan dan takaful keluarga

bagi individu dan pengecualian B2B bagi mengelakkan kesan cukai berganda, fi yang dijalankan secara patuh syariah serta penyedia perkhidmatan untuk Bursa Malaysia dan Labuan.

Cukai perkhidmatan akan dikenakan pada kadar 6.0 peratus ke atas perkhidmatan jagaan kesihatan swasta, amalan tradisional dan komplementari dan kesihatan bersekutu kepada bukan warganegara bagi penyedia perkhidmatan yang mencapai nilai ambang iaitu RM1.5 juta.

Kerajaan MADANI menyediakan layanan khas seperti warga negara Malaysia dikecualikan daripada membayar cukai perkhidmatan bagi perkhidmatan jagaan kesihatan awam dan swasta serta amalan tradisional dan komplementari meliputi perubatan tradisional Melayu, perubatan tradisional Cina, perubatan tradisional India, perubatan Islam, homeopati, kiropraktik dan osteopati.

Kerajaan MADANI prihatin terhadap kebimbangan dan keresahan rakyat mengenai cukai perkhidmatan yang dikenakan ke atas perkhidmatan kesihatan bersekutu antaranya rawatan fisioterapi, audiologi dan terapi pertuturan.

Sehubungan itu, sebagai bantuan tambahan bagi mengurangkan kos dan meningkatkan akses rakyat kepada perkhidmatan kesihatan secara menyeluruh, warga negara Malaysia turut dikecualikan daripada membayar cukai perkhidmatan bagi perkhidmatan kesihatan bersekutu.